



Despues cu ayera riba medionan di comunicacion a circula e noticia cu Gino Goeloe a keda reemplasa como lider di fraccion den Parlamento pa colega Ruthlyn Lindor, ayera Lindor a confirma esaki mediante un comunicado di prensa.

E noticia di e aparente reemplazo di Goeloe tabatin algun dia caba ta circula. Entre otro, fraccion MEP a hala atencion na e noticia, door di señala den un comunicado di prensa e reemplazo di Sr. Goeloe. Segun MEP, “tin un grupo” den partido Futuro “cu no

ta gusta cu Goeloe ta drumi hopi durante reunion y ta sinta hari cu oponentenan.” Den nan comunicado, MEP tambe a indica cu “segun fuente cerca di partido Futuro, nan no a keda mucho contento cu e cambio,” incluyendo e nombramento di Lindor, ya cu nan lo a “prefera pa Muzannin (Wever) ta lider di fraccion, pero no por pasobra Muzannin ta vice-presidente di Parlamento caba.”

Bon Dia Aruba a purba tuma contacto cu parlamentario Goeloe, como tambe minister Gerlien Croes, lider y fundador di partido Futuro,

Fraccion Futuro ta anuncia Ruthlyn Lindor como lider di fraccion den Parlamento



si por splica e motibo pakico a remplasa parlamentario Goeloe como lider di fraccion di Futuro, pero no a ricibi un contesta.

Eleccion di 2024 ta promebiaha cu parlamentario Goeloe ta subi un lista politico despues di a traha pa hopi aña como director di Fundacion Wit Gele Kruis. Parlamentario Goeloe tabata number tres riba lista di partido Futuro y a logra ricibi 297 voto.

Manera a keda confirma ayera mediante un comunicado di prensa, Ruthlyn Lindor a ser nombra como e lider nobo di fraccion. Esaki ta di dos biaha cu Lindor ta participa den eleccion. Na aña 2021 Lindor tabata candidato number cinco riba lista di partido RAIZ y a logra 170 voto. Den eleccion di 2024 Lindor a ricibi 176 voto.

Sinembargo, ayera Lindor mes a confirma e noticia den un comunicado di prensa,



indicando cu e motibo ta “responsabilidad comparti” den e partido.

“Contrario na locual por ta pasa den otro partido, lider di partido Futuro tin ful confianza den tur miembro di e Fraccion Futuro den Parlamento y no ta sinti cu e mester micromanage posiconnan,” aludiendo na e posible motibo pa e cambio. El a continua bisando cu “Fraccion Futuro ta kere den un estilo nobo di politica, uno basa riba rotacion di posiconnan y responsabilidad comparti. For di e comienso, nos fraccion a scoge pa haci cosnan diferente: liderazgo no ta exige of mantene un puesto, sino pa pasa e baston, comparti responsabilidad y muestra cu por hiba politica di un manera diferente.”

E comunicado di prensa a confirma cu pa e aña parlamentario 2025–2026, e carga di lider di fraccion Futuro lo ser ocupa pa Ruthlyn Lindor,

Master den Criminologia y eerstegraads docent.

“Cu e siguiente prioridadnan nos ta sigui cu nos trabao: educacion di calidad pa un y tur, oportunidadnan den deporte, musica, arte y STEM, miho cuido medico, promove seguridad di cuminda, acceso na un vivienda digno y pagabel pa nos ciudadanonan, mas proteccion, mas seguridad: pa nos hobennan, nos famianan, nos comunidad y un Aruba mas sigur pa un y tur. Na mes momento, Fraccion Futuro lo sigui haci su trabou den Parlamento, pa controla gobierno, pa responsabilisa gobierno y pa sigura cu cada decision berdaderamente ta contribui na un miho calidad di bida pa nos pueblo. Fraccion Futuro lo sigui sirbi comunidad di Aruba pa un mihor futuro pa nos tur,” e comunicado a conclui.

Wardacosta ta anuncia accion contra trahador acusa di mal comportamiento

Recientemente den medionan di comunicacion social, ciudadanonan a acusa un trahador di Wardacosta, E.N., cu comportamiento indebido y falta di integridad. Ayera, Wardacosta a reacciona den un comunicado di prensa, indicando cu nan “ta tumando tur paso pa por yega na medidanan necesario” pa atende e situacion.

Den un website di noticia local, a publica acusacion contra E.N., un trahador di Wardacosta di Caribe Hulandes, indicando cu e tabata actuando indebidamente. Entre otro, a conta cu E.N. ta busca manera pa parti multa pa cosnan chikito, mientras cu su propio comportamiento no ta

corecto.

Igualmente, a bisa cu E.N. ta tuma represalia contra cualkier persona cu cuestiona su actonan indebido y su falta di integridad. Tur esaki a pone cu un persona, kende a bisa di ta fada di haya multa “inhustamente” pa a yuda un otro persona riba lama, a dicidi di bay confronta E.N.

El a bin hay’e na beach cu algun persona, unda a bin ripara cu e tabata violando varios regla. Entre otro, tabatin su waverunner riba beach, algo cu no ta permiti. Tampoco e waverunnernan tabatin number di registro riba dje. Segun e persona, miembronan di Wardacosta a pasa unda E.N. tabata, pero no a haci ningun control di e situacion. Finalmente, ora E.N. a ripara cu



tabata sacando potret di su actonan, el a subi e waverunner pa huy, y a lubida di bisti vest, violando ley.

Segun e medio, tin mas persona a yega di expresa disgusto y a keha di e comporta-

mento di E.N.

Wardacosta a reacciona na e acusacionnan aki mediante un comunicado di prensa. “E sucesonan cu a tuma lugar den weekend cu a pasa, relaciona cu un miembro di nos

organizacion, ta algo serio y e tin tur nos atencion,” Wardacosta a bisa, enfatizando cu “Integridad ta e base di nos trabao di tur dia.”

Ademas, Wardacosta a anuncia cu ta bay tuma medida pa remedia e situacion. “Teniendo esaki na cuenta, nos ta tumando tur paso pa por yega na medidanan necesario, pa atende debidamente cu e comportamiento y e actonan cu e persona a comete. Na niun momento nos no ta permiti ni acepta e tipo di actonan aki.”

En conclusion, Wardacosta a enfatisa cu nan ta bay “sigui checuta nan trabao cu seriedad y dedicacion manera sa haci tur dia.”